

მეუფე დანიელი - ცრუ მოძღვრებათა გამრავლება არის სწორედ ანტიქრისტეს მოსვლის წინა პერიოდი, ვხედავთ, რომ რჩეული ქრისტიანული ერები თანდათან კარგავენ სარწმუნოებას



მეუფე დანიელმა სამების საკათედრო ტაძარში დღევანდელი ქადაგებისას წინასწარმეტყველის, ილია თეზბიტელის ხსენების დღესთან დაკავშირებით ისაუბრა.

მისი თქმით, ყველა ემზადება ამ დიდი დღესასწაულისთვის.

მეუფე დანიელის განცხადებით, ილია თეზბიტელი ჭეშმარიტი სარწმუნოების ცნობილი დამცველი იყო.

„თქვენ იცით, რომ ეს არის წმინდანი, რომელიც ცეცხლოვანი ეტლით იყო ცაში ატაცებული. საღმრთო სწავლების მიხედვით, უფალი დააბრუნებს მას, როდესაც დედამიწაზე დაიწყება ყველაზე სასტიკი დევნა სარწმუნოების. ეს იქნება მეორედ მოსვლის წინა ჟამი, როდესაც ანტიქრისტეს სახელით მოსული თვითმარქვია დაუნყებს დევნას ჭეშმარიტ სარწმუნოებას.“

ილია თეზბიტელი, როგორც ცნობილი დამცველი ჭეშმარიტი სარწმუნოების და მამცილებელი ცრუ მოძღვრებათა, კერპთაყვანისმცემლობისა, შეებრძოლება ცრუ სწავლებებს და მონამეობრივსა აღსასრულს მიიღებს. საქართველოს ეკლესიაში ყოველთვის იყო დიდი თაყვანისცემა ამ წმინდანისა, რადგან ქრისტეშობამდე ექვსი საუკუნით ადრე ჩვენი ქვეყანა გახდა ღირსი ილია თეზბიტელის მოსასხამისა. ეს არის ნიშანი იმისა, რომ განსაკუთრებით, როგორც ილია თეზბიტელი იქნება ბოლო ჟამს მადიდებელი ჭეშმარიტი სარწმუნოებისა და დამცველი ჭეშმარიტი სარწმუნოებისა, ასევე ის ქვეყანა, რომელსაც მიენიჭა მისი სინძინდე, მოწოდებულია, რომ იყოს ჭეშმარიტი დამცველი მართმადიდებლობისა და სწორედ ამისთვის ამზადებს უფალი ამ ქვეყანას.

ამიტომ დაუდგინა მფარველად ღვთისმშობელი და არ არის შემთხვევითი, რომ თანდათან ჩვენ ვხედავთ სწორედ ამ ჟამის მოახლოებას. მრავალი ნიშანია, მთავარი ნიშანი არის, როგორც უფალი სახარებაში ბრძანებს – გამრავლება ცრუ მოძღვრებათა და ცრუ წინასწარმეტყველებათა იმ სახით, იმ მასშტაბით, როდესაც თვით რჩეულნი, რჩეული პიროვნებები და ერები, ქვეყნებიც კი ცდუმდებიან. აი, ეს არის სწორედ ანტიქრისტეს მოსვლის წინა პერიოდი და ჩვენ ბოლო საუკუნეებში ვხედავთ, რომ რჩეული ქრისტიანული ერები თანდათან კარგავენ სარწმუნოებას, მათში სულ უფრო და უფრო მატულობს ღვთის სარწმუნოების მოწინააღმდეგე მღევნელი ძალები.

სწორედ მე-19 საუკუნეში, როდესაც საქართველოში შემოდიოდა სული ურწმუნოებისა, სული ღვთის ბრძოლისა, სწორედ მაშინ ღმერთმა მოუვლინა საქართველოს წმინდა ილია მართალი. ილია ჭავჭავაძე, რომელიც აღიმართა ვითარცა სალი კლდე ამ ბოროტი მანქანების წინააღმდეგ. არ არის შემთხვევითი, რომ მას ერქვა ილია. რადგანაც სწორედ თეზბიტელის შემართებით მხნედ ებრძოდა ყოველგვარ ანტიეროვნულ, ანტიქრისტიანულ ფასეულობებს“, – განაცხადა მეუფე დანიელმა.

საქართველოს მართლმადიდებელი ეკლესია 2 აგვისტოს წმინდა ილია მართლის ხსენების დღეს, სრულიად საქართველოს კათოლიკოს-პატრიარქ ილია მეორის ანგელოზის დღესა და წინასწარმეტყველ ილია თეზბიტელის ხსენებას აღნიშნავს.